

清河縣志卷之四

藝文

清河昔爲郡國自漢以來人文蔚起濟濟稱盛然年湮代遠著作無存斷簡殘編搜羅不逮文獻不足徵亦是邦士大夫之一憾也爰就見聞所及者略舉之以俟後之考證云爾

魏阮武撰正論五卷

魏張揖解司馬相如傳一卷

見漢書

晉清河太守陸雲集十二卷

唐劉輝悲甘陵賦一篇明山袁滋謂是賦褒善斥惡反春

秋旨然其文不可廢爲著後序

唐宋若華著女論語十篇女弟若昭又爲傳釋之

齊王昕文集

梁張暉天文錄三十卷梁天監間受詔集古天官及圖緯舊說爲之

唐張固撰幽閒鼓吹二十五篇

後梁崔居儉撰崔氏家禮

宋李祐之集三十卷

宋丁度撰備邊要覽

慶厯兵錄

瞻邊錄

邇英聖賢

龜鑑精義

元學士元明善文集三卷御史馬祖常撰神道碑末敘其
集有賦五詩一百六十三銘贊傳記五十九序三十雜著
十五碑志一百三十出入秦漢之間本之於六經以涵泳
其膏澤參之於諸子百家以騁其才辨刻而不見其跡新
而必自己出蔚乎其華敷鏗乎其聲古倡古學於當世爲
一代之文宗者聊城姚燧暨公而已信乎其必傳也銘曰
於維公文並古立大沛厥辭世莫及震驚蜚賸力不克蜚
聲天衢名薤薤位臻公卿發軔跡蘊而不施用弗極閭中
肆外真力充天藻綺縟琢圭璧五十四年返元宅臨川吳
澈又爲序畧曰復初少負才氣蓋其得於天者異於人

而又浸淫乎羣經蒐獵乎百家以資益其學問增廣其識類不與人同旣而仕乎內外應天下之物接天下之人其所資益增廣者又不特紙上之陳言故其文脫去時流畦徑而能盡古作者之道正矣而非易竒矣而非艱明而非淺深而非晦不狂亦不萎不俚亦不靡也登昌黎韓子之室者不於斯人而有望與

清河縣張府君墓石

唐刺史

柳宗元

河東人

貞元二十年六月一日清河張公諱會寢疾卽世於莫亭
碧深里之私第享年七十六自屬纊至於移窆朋從親臘
洎州里士君子無不慟怛嗚呼仁賢之云亡也哉惟公受
自軒黃而分厯代茂盛源流益別公卽清河之緒會祖皇
太子諮議郎諱崇祖皇中府折衝諱操父皇太子內直郎
諱禮公卽內直郎嗣也早歲有節克壯一心拳拳禮容執
德無倦逮夫弱冠遵道秉義汪汪然不可得而親不可得
而友挺出常度機畧內蘊時薊州刺史御史中丞榮公籍
公嘉公之才曷以從事情以道契三揖而進受靜塞軍營

田判官恭儉泣職勲績明著甄錄奏聞受遊擊將軍守右
領軍衛幽州開福府折衝都尉員外置同正員賜騎都尉
公疏勢賊諂心不苟合澹泊爲頤年之用視簪組爲伐性
之具遂辭名晦迹高卧雲物因家於三河邑背郭而東得
林巒之勝致也暨乎年逾不惑以長子瓊佐鄭亭侯嘉聲
洋洋多歷年數由是閱實觀政巾車以來郡邑清暢禮容
大備旣釋我願斯不返駕守真空微妙之性會紛紜繁賾
之旨浩浩方寸洞豁塵境不其至歟嗟乎大道無涯天命
有定雖聖明不能越常運而超物外哉公以疾起無妄情
不嗜藥坦蕩居易悔咎莫有星歲幾周大漸長往嗚呼天

富其道而闕於壽謂之何哉夫人北平田氏哀而得禮有
子二人瓊等卜耐先塋龜筮告吉以其年十一月一日窆
於任邱東北長邱鄉原禮也二嗣號擗痛深泣血哀告以
先遠有請以誌之宗元承命不忤刻之貞石銘曰蘭茝其
馨金玉其貞碎碎折之何神不明茂旌其英德立行成悠
悠銘旌洋洋懿聲孝子令孫宅兆郊原龜筮叶從慶流後
昆

貝州平賀表

宋 歐陽修

伏聞閏月一日攻下貝州殺到妖賊王則者盜孽竊興人
祇其潰果憑睿算悉殄凶徒臣某伏惟皇帝陛下推仁育
物浸澤在人常服儉以躬行惟足兵而在念至於多損金
幣講好戎夷務體戰爭愛惜士卒德至深而莫報恩既厚
則生驕敢肆妖狂自干斧鉞驅憎土衆閉守城闕既違天
而逆人宜不攻而自破而况聖神運畧將相協忠不遺一
矢成就大戮悖慢者警而肅恪昏愚者知有誅夷銷沮姦
萌震揚威令臣幸忝郡寄欣聞德音

文忠公
文集

定光佛墓碑記

宋 吳 浚

定光蔭覆沙界救度衆生發慈憫心示威神力其誰有功
在乎覺皇矣爰自法身現滅靈骨斯存龍神尤切於護持
人天得伸於供養歸心不退獲福無邊貝州隆興寺舍利
塔者舊舊所傳云定光如來真身舍利接石記仁壽二年
奉安於此先是兵亂閭闔失守遺基莫覩靈應尤多則有
道者僧超一洞發真誠特興至願堅心苦力廢寢忘餐化
導衆情僅二十載復有故府主侍中清河公光翰廣敷行
業深植善根俾遂良緣共成勝事乃於本寺內建造甃塔
一所共一十二級計甃一百三十尺塔之內又甃石棺一

所棺之內又造金棺銀槨并製金鑲瓶越以宋乾德五年
歲在丁卯四月八日丙寅年舍利五十二粒指骨一節於
其內以安置焉是日也雲屯士庶霧集生徒共結勝因咸
乞景福伏願慈雲廣蔭化日遐臨聖主當朝永播照蘇之
化勲臣佐國彌隆鎮撫之功人民獲保於康樂封域俾諧
於安靜壽山堅固業海蕩平空王之聖教大行開士之高
風不墜普天率土悉離樊籠異類羣生咸登正覺浚幼師
儒素長慕佛乘尙處迷津未達彼岸幸列參禪之職得諧
瞻禮之心爰以直書庶臻妙果故記

移學碑記

金翰林瑯琊 堪

清河在齊阜昌初爲河水墊溺因徙治厯亭而清河遂爲屬邑初郡庠居譙門之西暨遭水患齋宇蕩然水旣復固其基爲右司理旣及州徙又爲巡檢司凡三易訖爲主簿之公宇自學之廢距今幾四十年而生徒肄業之所歲時致敬之地闕然無所按每春秋釋奠則假令廳事會不若繼流羽徙居必置祖以嚴奉其所自出大定癸未歲十二月建安張公格來佐是邑就舍之初詢其故惻然感發承請於邑令劉公惠公忻然傾其意曰此惠之宿心君其成之乃舍以私錢三十萬助其費旣而酒監高君貞士進士

張伯達以及皇安止諸君樂聞其事一倡百和分務營新
吏民翕然唯恐其後於是鳩工度材卜縣之東南隅宋監
司公署之故基乃爲宣聖殿以嚴像設東西齋廡分焉碑
亭門宇煥然一新壯而不華儉而不隘經始於大定四年
三月落成於五年九月所用蓋二百萬然後莫諠者有所
絃誦者有歸

重修廟學記

元魏天章

學記曰君子知欲化民成俗其必由學乎是故古之王者建國君民教學爲先古之教黨有庠術有序國有學此之謂也然而學校則有廢有興風俗則有美有惡時世則有污有隆吾道則有顯有晦是以知學之興廢則俗從而美惡時之污隆則道從而晦顯然爲得其人則廢者可以興惡者可以美污者可以隆晦者可以顯苟不遇其人則廢而不能興惡而不能美污而不能隆晦而不能顯此古今之通論而百世不能易也夫清河縣者迹有由來自東漢時尊爲甘陵郡至唐改爲貝州歷宋及金爲惡美北近黃

河連年經渰遂徙州事於歷亭此邑止爲清河縣也今爲
大名府之屬邑去府二百餘里孤城遠寓驛使往來爲治
誠不易哉邑之宣聖廟始於金大定七年重創之後至今
百有餘年矣自大元開國以來至於今日其間宰是邑者
奚啻數十人而已知其爲政之先風化之原在於學校而
能修廣黌舍增飭廟堂者夫何人哉達魯花赤伯縣尹邵
氏名維禎主簿公孫氏重喜下車之始同詣文廟仰瞻吾
夫子大成之殿板堂卑下廟宇叢如側壁隤檐傾楹欹棟
又見碑樓毀盡路門半摧慨然共有興復修起之志焉遂
於公庭諭諸同僚縣尉公蒙古氏八剌典史張公名國顯

暨邑之儒學教諭蒙古氏八都等協謀共議特擬改作爲
事上下官吏旨意合同一倡和因不忤然遂及同心戮力
各出一年之俸給充工匠之資及邑之儒人丁允中張德
昭及張珪等并郡中士庶從而助者各有等差遂鳩工度
材選期興作達魯花赤伯縣尹邵公主簿公孫重喜親身
監督自朝至暮不遑暇食經始於至元三十一年之十月
落成於元貞月前後始終都無期月撤大成之殿舊貫板
堂單料順拱改爲西鋪之作蓋棟雕梁藻繪輪奐增廣崇
高方之舊宇六尺其階址砌用磨甃東西廊廡前後門樓
皆峙講堂旁齒兩序碑門創建路門重修廟堂廊廡齋室